

四庫全書

集部

欽定四庫全書

藥城集卷十一

宋 蘇轍 撰

詩八十六首

和毛君新葺困菴船齋

厭居華屋住東庵
真味全勝食薺甘
多病維摩長隱几
無心彌勒便同龕
誤遊田舍空成笑
謬入僧房即欲參
風霽不知吹有萬
月明聊共影成三
齋如小舫才容住

室類空固定不貪擁褐放衙人寂寂脫巾漉酒鬢鬢
畫囊書帙堆憲案藥裹瓢樽挂壁藍簷竹風霜曾不到
盆花蜂蝶未全諳公餘野鵲驚初睡賓醉佳人笑劇談
勸客巨觥那得避和詩難韻不容探曉來霏霧連江氣
冬後溫風帶嶺嵐去國屢成還蜀夢忘憂惟有對公酣
終身徇祿知何益投檄歸耕貧未堪借我此庵泥藥竈
古書鴻寶試淮南

寒雨

江南殊氣候冬雨作春寒冰雪期方遠蕉絺意始闌未
妨溪草綠先恐嶺梅殘忽發中原念貂裘據錦鞍

積雨二首

山雨無時歇江波上岸流泥深未免出橋斷更堪憂房
淺鄰糟甕宵寒攬絮裘朝來勢未已歸路恐操舟

其二

微陽力尚淺未解破重陰雲氣山川滿江流日夜深凍
芽生滯穗餘潤及重衾泥濘沈車轂農輸絕苦心

戲贈李朝散

江霧霏霏作雪天
樽前醉倒不知寒
後堂桃李春猶晚
試覓酥花子細看

戲答

銀瓶瀉酒正霜天
玉塵生風夜更寒
下客不辭投轄飲
好花猶恐隔簾看

臨江蕭氏家寶堂

高人不解作生涯
唯有中堂書五車
竹簡多於孔氏壁

牙籤新似鄴侯家田園豈是子孫計青紫今為里巷誇
富貴早知皆有命君應未厭十年賒

和蕭利察推賀族叔司理登科還鄉四首

家聲籍籍大江西南老揮毫捧御題得意何殊少年樂
還家不惜醉如泥

讀盡家藏萬卷書蕭然華髮宦遊初區區獄掾何須愧

聊把春秋試緒餘

漢儒以春秋決獄

作官未減讀書勤簿領從今日日新汗簡韋編誰付子

傳家應有下帷人

巷南諸子足才賢邂逅相逢秀句傳
強作短章同寄與
異時見我一依然

次韻吳厚秀才見贈三首

騷人思苦骨巖巖百里攜詩相就談
故作微詞挑遷客
不嫌春雨濕歸衫
少年舊喜登高賦
老病今成見敵慙
問我近來誰復可對君聊擬誦周南

久欲歸田計未成
羨君負郭足為生
躬耕不用千鍾祿

高卧誰知萬里征已覺安閑真樂事可憐辛苦盡浮名
隱居便作江南計為覓佳山早寄聲

一卷新詩錦一端掉頭吟諷識芳酸哀歌永夜悲牛角
朗詠扁舟笑杏壇間發笙簧猶可擬棄捐斤斧定知難
繼君高韻君應笑咀嚼歸途久據鞍

次韻毛君燒松花六絕

茅庵紙帳學僧眠爐爇松花取易然唯有未能忘酒在
手傾金盞鬪垂蓮

麝雜松黃二月天盤敲松子早霜寒山家一物都無棄

狼藉乾花最後般

蜀人以松黃為餅甚美

松老香多氣自嚴餘烟勃鬱透疎簾須臾過盡惟灰在

借問誰收一番

去聲炎

美人寒甚懶開扉金作松花插幕羅幾度低頭凝墮落
青烟已斷未消時

枯萼鱗皴不復堅重重正似半開蓮曾經樵舍埽爐見
未許邦君畫閣然

黃蠟供炊自一家，錙銖貧富遞矜誇。
都城爭買方薪貴，却顧松花已自奢。

陪毛君遊黃仙觀

李叟仙居仍近市，黃公道院亦依城。
定應昔日山林地，未有今時雞犬聲。
白鶴翻飛終不返，黃冠憔悴只躬耕。
試從車騎尋遺跡，恐有居人解養生。

次韻王適梅花

江梅似欲競新年，照水窺林態愈妍。
霜重清香渾欲滴。

月明素質自生烟未成細實酸猶薄半落南枝意可憐
誰寫江西風物樣徐家舊有數枝傳

次韻王適春雪二首

江南春候寒猶劇細雨風吹作雪花中夜窓扉初晃漾
平明草木半低斜潤催江柳排金綠光雜山茶點絳葩
老病不堪乘曉出紛紛能使髮增華

春雪飄搖旋不成依稀履跡散空庭山藏複閣猶殘白
日照南峯已半青

毛君惠溫柑荔支二絕

楚山黃橘彈丸小未識洞庭三寸柑
不有風流吳越客誰令千里送江南

荔子生紅無奈遠陳家曬白到猶難
雖無驛騎紅塵起尚得佳人一笑歡

次韻王適遊真如寺

江上春雨過城中春草深擾擾市井塵
悠悠溪谷心東郊大愚山自古簷蔔林
微言久不聞墜緒誰當尋道俗

數百人請聞海潮音齋罷車馬散萬籟俱消沈新亭面
南山積霧開重陰蕭然偶有得懷抱方惜惜我坐米鹽
間日被塵垢侵不知山中趣強作山中吟

次韻王適新燕

好雨纖纖潤客衣新來雙燕力猶微似嫌春早無人見
故待簾開掠地飛南國花期知不遠中原寒劇未應歸
養雛不怕巢成早記取朝朝為啟扉

官居即事

官局紛紜薄領迷生緣瑣細老農齊偷安旋種十年木
肉食還須五母雞對酒不嘗憐酤椎釣魚無術漫臨溪
此身已分長貧賤執爨縫裳愧老妻

陪毛君夜游北園

池塘草生春尚淺桃李飛花初片片一尊花下夜忘歸
燈火尋春畏春晚春風暗度人不知滿園紅白已離披
江南春雨少晴日露坐青天能幾時折花只恐傷花意
攜客就花花更喜落蕊飄香翠袖中交柯接葉燈光裏

雨練風柔雪不如精神炫轉影扶疎夜看飛燕勝朝日
月暗還須明月珠美人勸我殊非惡明日雨來無此樂
醉歸不用怕山公馬上接羅先倒著

山橙花口號

故鄉寒食荼蘼發百和香濃村巷深漂泊江南春欲盡
山橙髣髴慰人心

次韻馮弋同年

細雨濛濛江霧昏坐曹聊且免泥奔賣鹽酤酒知同病

一笑何勞賦北門

送王適徐州赴舉

送別江南春雨淫北方誰是子知音性如白玉燒猶冷
丈似朱弦叩愈深萬里同舟寬老病一杯分袂發悲吟
明年榜上看名姓楊柳春風正似今

游吳氏園

細雨作寒晴便暖好風吹袂意初佳清池解洗春心熱
紅艷能添醉眼花紫竹暗生岷岫笋山舟強比洛人家

憐渠巧與閑官便申退來游未覺賒

江州周寺丞泳夷亭

行過廬山不得上
溢江城邊一惆悵
羨君山下有夷亭
千巖萬壑長相向
山中李生好讀書
出山作郡山前居
手開平湖浸山脚
未肯即與廬山疎
道州一去應嫌遠
千里思山夢中見
青山長見恐君嫌
要須罷郡歸來看
次韻毛君遊陳氏園

增築園亭草木新
損花風雨怨頻頻
簷簷似欲迎初暑

芍藥猶堪送晚春
薄暮出城仍有伴
攜壺藉草更無巡
歸軒有喜知誰見
道上從橫滿醉人

江漲

山中三日兩江水
一丈高崩騰沒州渚
淫溢侵蓬蒿凌
晨我有適出門
舟自操中塵已易
肆下道先容舫
雞犬萃墳冢牛羊
逾圈牢厨薪散流
枿困米為浮糟卧
席不遑卷剥蠶仍
未繅老弱但坐視
閭里將安逃徙居
共擾擾來勢方滔
滔嗟余偶同病哀
爾為生勞晴日慰
人願

寒風送驚濤藩籬出舊趾羸蚌遺平臯流竄非擇地艱
難理宜遭胡為苦戚戚一夕生二毛

和子瞻鐵拄杖

截竹為杖瘦且輕石堅竹破誤汝行削木為杖輕且好
道遠木折恐不到聞君鐵杖七尺長色如黑蛇氣如霜
提攜但恐汝無力撞堅過險安能傷柳公雖老尚強健
閉門却掃不復將知公足力無嶮阻憐公未有登仙侶
回生四海惟一身袖中長劍為兩人洞庭漫天不覺過

半酣起舞驚鬼神願公此杖亦如此適意遨遊日千里
歸來倚壁示時人海外蒼茫空自記

競渡

史君欲聽榜人謳一夜江波拍岸流父老不知招屈恨
少年爭作弄潮遊長鯨破浪聊堪比小旆逆風殊未收
角勝爭先非老事凭闌寓目思悠悠

登郡譙偶見姜應明司馬醉歸

蒼然暮色映樓臺江市遊人夜未迴何處酒仙無一事

肩輿鼯睡過橋來

送姜司馬

七歲立談明主前江湖晚節弄漁船
鬪雞誰識城東老喪馬方知塞上賢
生計未成歸去詠草書時發醉中顛
當年不解看齊物氣踴如山誰見憐

寄題趙岵承事戲綵堂

春晚安輿遍浙東永嘉別乘喜無窮
橐裝已笑分諸子吏道何勞問薛公
堂上壽樽諸掾集室中禪論衲僧通

興闌却返林泉去幕府長留孝弟風

次韻溫守李鈞見寄兼簡毛大夫

梁苑相從簿領中清風相逐畫船東
婆婆江海凌雲鶴飲啄籠樊失渚鴻
別後丹砂迷舊訣愁來白髮變衰翁
此間詩老仍勍敵正憶高吟酒盞空

次韻洞山克文長老

無地容錐卓年來轉覺貧偶知珠在手一任甌生塵竄
逐非關性顛狂却甚真此心誰復識試語洞山人

試院唱酬十一首

戲呈試官呂防

新秋風月正涼天
空館相看學坐禪
滿榻詩書愁病眼
隔牆砧杵思高眠
霜飛一葉凋瓊玉
風遶雙松奏管絃
聞道熊羆歸夢數
侵天闌棘漫森然

次韻呂君豐城寶氣亭

紫氣飛空不自謀
誰憐黽匄匣中留
西山猛獸橫行甚
北海長鯨何日收
星斗不堪供醉舞
蛟龍會看反重湫

功成變化無蹤跡望斷中原百尺樓

次韻呂君見贈

偶然傾蓋接清言不覺門前晝漏傳
老病低摧方伏櫪壯心堅銳正當年
莫嫌客舍一杯酒試論瀟山三祖禪
明日程文堆几案只應衰懶得安眠

呂前官舒州
問禪瀟山

次韻呂君興善寺靜軒

自恨尋山計苦遲年過四十始知非
小軒迎客如招隱野鳥窺人自識機
窓外竹深孤鶴下堦前菊秀晚蜂飛

老僧戰勝長幽寂瘦骨緣何未肯肥

觀試進士呈試官

松庭散朝日棘戶啟秋風鵠鷺紛來下旌旗儼未攻馳
詞看倚馬餘力送征鴻逸足誰先到孤標想暗空晶熒
雙鏡並高下片言公老病方耽睡飛沈一夢中

次前韻

南國號多士幾人洙泗風英材自入殼壞陣不勞攻文
縟山藏豹飛高弋慕鴻虫妍歸品藻得失付虛空考行

先推本登賢旋奏公期君緩歸轡一醉鹿鳴中

戲呈試官

只隔牆東便是家
悁悁還似在天涯
客心不耐聽松雨
歸信猶堪飲菊花
剪燭看書良寂寞
披沙見玉忽喧譁
自慙空館難留客
試問姮娥稍駐車

次前韻三首

老去在家同出家
楞伽四卷即生涯
粗詩怪我心猶壯
細字憐君眼未花
霜落初驚衾枕冷
酒酣猶喜笑言譁

歸心知有三秋恨莫學怱怱下坂車

門前溪水似漁家流浪江湖歸未涯邂逅高人來說法
支離枯木旋開花諸生試罷書如積劇縣歸時訟正譁
安得騎鯨從李白試看牛女轉雲車

濁醪能使客忘家屈指歸期已有涯魚化昨宵驚細雨
鹿鳴他日飲寒花已諳江上有蔬薄莫笑衙前鼓笛譁
太守況兼鄉曲舊會須投轄止行車

試罷後偶作

重門閉不開鳥鳥相呼樂晨暉轉簾影微風響松未喧
譁適已定寂歷方有覺人生竟何事外物巧相縛當時
不自悟已過空成忤耕耘亦何苦遊宦殊自惡棄彼既
已誤就此良應錯誰能即兩忘隨緣更無作

放榜後次韻毛守見招

飽食安眠愧不材疏簾翠帟幸相陪深居正厭銀袍亂
失喜初聞鐵鎖開佳句徑蒙探古錦小槽仍報滴新醅
諸人欲見風流伯不用招呼亦自來

送毛滂齋郎

先志承顏善養親束裝騎馬試為臣
酒腸天予渾無敵詩律家傳便出人
攤鼻高吟方自得折腰奔走漸勞神
歸來一笑須勤取花發陳吳二月春

燕貢士

泮水生芹藻干旄在浚城桑鵠同變響
苹鹿共和鳴秋晚槐先墮霜多桂向榮
清尊助勸駕急管發驩聲勇銳青衿士
淹通白髮生芬芳雜蘭菊變化等鵬鯨
去日衣

冠盛歸時里巷驚坐中詞賦客愧爾一經明

次韻毛君清居探菊

眼前黃葉畏秋霜耳畔啼蛩怨夜長佳節欣聞近萸菊
清商試為奏伊涼疎狂久笑謀生拙貧病應憐為口忙
今日共君拚一醉從教人道亦高陽

次韻毛君見贈

江國騷人不耐秋夜吟清句曉相投鋒藏豈願囊中脫
尾斷終非俎上羞擇地何年真得意鋪糟是處可同遊

南遷尚有公知我人事何須更預謀

次韻毛君偶成

年來衰病正相兼薄宦奔馳尚未厭
詩句空多渾漫興俗緣已重不須添
聾牙向物知難合疎懶憐公獨未嫌
時聽淵明詠歸去猶應為我故遲淹

孔平仲著作江州官舍小庵

近山不作看山計引水新成照水庵
閉口忘言中自飽安心度日更誰參
簡編圍遠穿書蠹窓戶低回作蠹蟄

我亦一軒容膝住敝裘粗飯有餘甘

送饒州周沃秀才免解

少年工作賦中歲復窮經驥老終知道劍埋新發硎東
裝鄰里助荅策友朋聽還似臨淄貢隨風起北溟

雪中洞山黃蘗二禪師相訪

江南氣暖冬未回北風吹雪真快哉雪中訪我二大士
試問此雪從何來君不見六月赤日起冰雹又不見臘
月幽谷寒花開紛然變化一彈指不妨明鏡無纖埃

毛國鎮生日二絕

生日元同小趙公里間相接往還通怪公日夜歸心切

欲寄此生丹竈中

世謂叔平大趙叅政趙公善養生故有丹竈之句

聞公歸橐尚空虛近送楞嚴十卷書心地本無生滅處
定逢生日亦如如

次韻毛君將歸

疎傳思歸不待時孟軻出畫苦行遲新詩尚許留章句
故事誰從問典彝金馬尚應堪避世石泉未信可忘饑

不才似我真當去零落衡茅隔雍岐

送楊騰山人

胸中萬卷書不如一囊錢不見楊夫子歲晚走道邊夜
歸空牀卧兩手摩涌泉窓前雪花落真火中自然渙然
發微潤飛上崑崙顛霏霏雨甘露稍稍流丹田閉目內
自視色如黃金妍至陽不獨凝當與純陰堅一窮百不
遂此事終無緣君看抱朴子共推古神仙無錢買丹砂
遺恨盈塵編歸去守茅屋道成要有年

次韻子瞻與安節夜坐三首

前山積雪暮崢嶸
燕坐微聞落瓦聲
共對一尊通夜語
相看萬里故鄉情
信歸嶺上寒梅遠
恨極江南春草生
明日青銅添白髮
且須醉睡倒燈檠

少年高論苦崢嶸
老學寒蟬不復聲
目斷家山空記路
手披禪冊漸忘情
功名久已知前錯
婚嫁猶須畢此生
家世讀書難便廢
漫留案上鐵燈檠

謫官似我無歸計
落第憐渠有屈聲
握手天涯同一笑

倚門歲晚不勝情黃岡俯仰成陳迹白首蹉跎畏後生
歸去且安南巷樂莫看歌舞醉長樂

次韻毛君上書求歸未報

白髮憂民帶減圍頻聞慷慨賦將歸近傳道士連三嘯
久悟禪門第一機夜永庵中詩自得日高門外客來稀
此心素定誰能勸祇有丁寧詔莫違

次韻毛君絕句

中池有士閉重關夜發天光走玉環白日對人人不識

幅巾破褐任塵漫

次韻毛君留別

問天乞得不訾身屈指人間今幾人
魚縱江潭真窟宅
鶴飛松嶺倍精神清風吹雨停歸騎
舊圃留花送晚春
自號白雲知有意便從丹竈拂埃塵

送毛君致仕還鄉

古人避世事豈問家有無但言鴻鵠性
不受樊籠拘
公家昔盛時阡陌連三衢倉廩濟寒餓
婚嫁營羈孤千金

赴高義脫手曾須臾晚為二千石得不償所逋撫掌不
復言但以文字娛我恨見公遲冉冉垂霜鬚高吟看落
筆劇飲驚倒壺負罪不自知適意忘憂虞忽聞叩天閭
言旋故山廬朋友不及謀親戚亦驚呼人生各有意何
暇問俗徒嗟我好竒節嘆公真丈夫天高片帆遠目斷
清風徂惟應東宮保迎笑相攜扶

贈景福順長老二首

并序

輒幼侍先君聞嘗遊廬山過圓通見訥禪師留連久

之元豐五年以謫居高安景福順公不遠百里惠然
來訪自言昔從訥於圓通逮與先君遊歲月遷謝今
三十六年矣二公皆吾里人訥之化去已十一年而
順公年七十四神完氣定聰明了達對之悵然懷想
疇昔作二篇贈之

屈指江西老多言劍外人身心已無著鄉黨漫相親
竄逐知何取周旋意甚真仍將大雷雨一洗百生塵

其二

念昔先君子南遊四十年相看順老在想見訥師賢歲
歷風輪轉禪心海月圓常情計延促無語對潸然

次韻孔平仲著作見寄四首

昔在京城南成均對茅屋清晨屣履過不顧車擊轂時
有江南生能使多士服同儕畏鋒銳兄弟更馳逐文成
劇翻水賦罷有餘燭連收領底髭未耗髀中肉飛騰困
中路黽勉啄場粟歸來九江上家有十畝竹一官粗包
裹萬卷中自足還如白司馬日聽杜鵑哭我來萬里外

命與江波觸罪重慙故人囊空仰微祿已為達士笑尚
謂愚者福米鹽已草草奔走常碌碌尺書慰貧病佳句
爛珪玉多難畏人知胡為強題目徂年慕桑梓歸念寄
鴻鵠但願洗餘愆躬耕江一曲

其二

共居天地間大類一間屋推排出高下何異車轉轂死
生本晝夜禍福固倚伏誰令塵垢昏浪與紛華逐譬如
薪中火外照不自燭感君探至道勸我減梁肉虛心有

遺味實腹不須粟
芬敷謝桃杏清勁比松竹
息微知氣定睡少驗神足
胡為嗜一飽坐使百神哭
要知丹砂異不受腥腐觸
可憐山林姿自縛斗升祿
君看出世士肯屑世間福
寧從市井遊與衆同碌碌
不願束冠裳腰金佩鳴玉
斯人今何在未易識凡目
恐在廬山中飛翔逐黃鵠
試用物色尋應歌紫芝曲

其三

百病侵形骸漸老同破屋
中有一寸空能用輻與轂
忽

如丹砂走不受凡火伏前瞻已不遠後躡愈難遂將炊
甑中飯未悟窓下燭聰明役聲形口腹嗜魚肉塵泥翳
泉井荆棘敗禾粟未知按妙指漫欲理絲竹廬山多名
縉過客禮白足達觀等存亡世俗強歌哭確然金石心
不畏蚊蚋觸順忍為裳衣供施謝榮祿真人我自有渡
海笑徐福衆皆指庸庸自顧非碌碌愧君詩意厚桃李
報瓊玉舉網羅衆禽有獲非一日喧啾定無用要自取
黃鵠君看大方家慎勿留一曲

其四

治生非所長兒女驚滿屋作官又迂疎不望載朱轂因
緣罣罪罟未許即潛伏空餘讀書病日與古人逐老妻
憐眼昏入夜屏燈燭上官念貧窶時節饋醪肉衰年類
蒲柳世事劇麻粟數日望歸田寄語先栽竹文章亦細
事勤苦定何足君詩四相攻欲看守陴哭愧無即墨巧
不解火牛觸自非太學生彫琢事干祿安心已近道閉
口豈非福胡為調狂詞玉石相落碌腹中抱丹砂舌下

漱白玉作詩雖云好未免亂心目奕秋教二人不取志
鴻鵠摩詰非不言遺韻寄終曲

陰晴不定簡唐覲祕校并教吳二君五首

積雨春連夏新晴忽復陰江痕漲猶在梅氣潤相侵蕉
紆還須脫圖書漸不禁江南舊風俗愁絕北來心

其二

蠶眠初上簇麥熟正磨鎌雲氣重重合江流夜夜添薦
饑人甚困多病我仍兼欲就橋南宿單衣暮雨霑

其三

漲江方斷渡小棹信輕生貧賤誰憐汝漂浮空自驚一
官終竊食何計早歸耕忽發騷人恨淒涼久未平

其四

西鄰豫章客病骨瘦藥藥清夜眠孤枕終朝飽一簞雨
多愁不出講罷未應餐約我晴相過門前泥欲乾

其五

二子薪中楚相攜泮上遊藿鹽聊度日爰象久忘憂寂

冥君何病驅馳我自羞
何時采芹處永日看鳬鷗



藥城集卷十一

欽定四庫全書

集部
樂城集卷十二

詳校官庶吉士臣胡鉦

檢討臣何思鈞覆勘

總校官進士臣朱鈐

校對官助教臣胡予襄

謄錄監生臣呂沛惇

欽定四庫全書

樂城集卷十二

詩八十九首

雨後遊大愚

風光四月尚春餘
淫雨初乾積潦除
古寺蕭條仍負郭
閑官踈散亦肩輿
摘茶戶外蒸黃葉
掘笋林中間綠蔬
一飽人生真易足
試營茅屋傍僧居

宋 蘇轍 撰

送高安羅令審禮

一邑憂勞水旱中
牛刀閑暇似無功
政成仍喜新蠶熟
歸去還將舊橐空
清白久聞誇父老
沈埋誰為懇諸公
謫居長恨交遊少
悵望肩輿又欲東

送唐覲

溪上幽居少四鄰
西家幸有著書人
經年食菜誰憐瘦
終日題詩自不貧
身在江湖釣竿地
心馳蘭會戰車塵
此行便有飛騰處
笑殺年來老病身

唐君常欲為陝西
官慨然有功名之

志

次韻唐覲送姜應明謁新昌杜簿

夫子雖窮氣浩然輕簑短笠傲江天薄遊到處唯耽酒
歸去無心苦問田泮上講官殊不俗山中老簿亦疑仙
相從未足還辭去欲向曹溪更問禪

姜如晦方作
嶺外之行

新種芭蕉

芭蕉移種未多時濯濯芳莖已數圍畢竟空心何所有
敬傾大葉不勝肥蕭騷暮雨鳴山樂狼藉秋霜脫敝衣

堂上幽人觀幻久逢人指示此身非

次韻姜應明黃蘗山中見寄

垂老閒居味更深此身隨世任浮沉
北窓未厭曲肱卧西洛能傳攤鼻吟
足馬徬徨猶寄食敝裘安樂信無心
我今漂泊還相似同愧高僧支道林

次韻黃大臨秀才見寄

故人聚散霜前葉往事眇茫風際烟
遊宦一生非有已隱居萬事不由天
崎嶇檻穽方謀食嘯傲山林肯計年

賴已將心問盧老相逢他日笑風顛

次韻李朝散遊洞山二首

古寺依山占幾峰精廬髣髴類天宮
三年欲到官為礙百里相望意自通
無事佛僧何處著入羣鳥獸不妨同
眼前薄領何時脫一笑相看丈室中

僧老經時不出山法堂延客未曾闌
心開寶月嬋娟處身寄浮雲出沒間
休夏巾緋誰與共迎秋水石不勝閑
近來寄我金剛頌欲指胸中無所還

簡學中諸生

泮水秋生藻荇涼暮窓燈火亂螢光圖書粗足惟須讀
菽粟才供且自強羽籥暗催新節物弦歌不廢近詩章
腐儒最喜南遷後仍見西雛白鷺行

以蜜酒送柳真公

牀頭釀酒一年餘氣味全非卓氏壚送與幽人試嘗看
不應知是百花鬚

次韻柳見答

桂酒無人寄豫章

江西官釀惟豫章最佳

羈愁牢落遣誰當烹煎

崖蜜真牽強慙愧山蜂久蓄藏江上鱸膾橙正熟山頭
吹帽菊初香漂流異日俱陳迹笑說過從想未忘

披仙亭晚飲

落日欲沒多雲烟南山暝鷗歸北山樓臺城上半明滅
燈火橋頭初往還江西八月熱猶在坐中遷客頭欲斑
何時解網聽歸去黃花白酒疎籬間

余居高安三年每晨入暮出輒過聖壽訪聽長老

謁方子明浴頭笑語移刻而歸歲月既久作一詩
記之

朝來賣酒江南市日暮歸為江北人
禪老未嫌參請數
漁舟空怪往來頻
每慙菜飯分齋鉢
時乞香泉洗病身
世味漸消婚嫁了
幅巾緇褐許相親

次韻子瞻感舊見寄

少年耽世味徘徊不能去
老來悟前非尚愧昔遊處
君才最高峙鶴行雞羣中
我雖非君對顧以兄弟同結髮

皆讀書明月入我牖縱橫萬餘卷臨紙但揮手學成竟
無用掩卷空自疑却尋故山友重赴幽居期秋風送餘
熱冉冉如人老衣裳當及時田廬亦須早種竹竹生笋
種稻稻亦成浩歌歸來曲曲終有遺聲

次韻和人豐歲

風雨迎寒欲勞農今年真不負元豐蓋藏共荷官無擾
眠食安知帝有功草笠黃冠將蜡祀羔羊朋酒亦幽風
請君早具躋堂飲退食委蛇正自公

同孔常父作張夫人詩

女子勿言弱男兒何必強君看張夫人身舉十五喪頭
上脫笄珥篋中斥襦裳築墳連邱山松柏鬱蒼蒼親戚
不為助涕泣感道傍昔有王氏老身為尚書郎親死棄
不葬簪裾日翱翔白骨委廬陵宦遊在岐陽一旦有丈
夫軒軒類佯狂相面識心腹開口言災祥嗟汝平生事
不了令誰當汝身暖絲綿汝口甘稻粱衣食未嘗廢此
事乃可忘一言中肝心投身拜其牀傍人漫不知相視

空茫茫終言汝不悛物理久必償兒女病手足相隨就
淪亡鄙夫本愚悍過耳風吹牆明年及前期長子憂髡
瘍一麾守巴峽雙柩還故鄉弱息雖僅存蹢躅亦非良

誰言天地寬網目固自張古事遠不信近事世所詳企

張非求福禍敗當懲王

嘉祐末年李士寧言王君事於
右扶風其報甚速張夫人南都

人孔推官常甫作詩言其賢邀余
同作并言李生事或足以警世云

次烟字韻答黃庭堅

病卧江干鬚帶雪老捻書卷眼生烟貧如陶令仍耽酒

窮似湘纍不問天，令弟近應憐廢學。大兄昔許叩延年。

比聞蔬茹隨僧供，相見能容醉後顛。

魯直兄舊於齊州以養生見教

東軒長老二絕

并序

始余於官舍營東軒，彭城曹君煥子文自浮光訪余於高安道過黃岡家兄子瞻以詩送之曰：君到高安幾日迴，一時抖擻舊塵埃。贈君一籠牢收取，盛取東軒長老來。君過廬山見圓通，知慎禪師出詩示之。師嘗與余通書見之欣然，明日謂君：昨見黃州詩，通夕

不寐以一偈繼之曰東軒長老未相逢却見黃州一
信通何用揚眉資目擊須知千里事同風吾野人不
能數為書君為我誦之而已君既至未暇及此客有
自廬山至者曰慎師送客出門還入丈室燕坐而寂
君乃具道其事余感之作二絕其一以答子瞻其二
以答慎也

東軒正似虛空樣何處人家籠解盛縱使盛來無處著

雪堂自有老師兄

子瞻新築東坡雪堂

檐頭挑得黃州籠行過圓通一笑開却到山前人已寂
亦無一物可擔迴

題方子明道人東窓

紙窓雲葉淨香篆細烟青客到催茶磨泉聲響石竈禪
闌敲每應丹訣問無經贈我刀圭藥年來髮變星

次前韻

閉門何所事毛髮日青青齒折登山屐塵生貫酒餅調
心開貝葉救病讀難經定起無人見寒燈一點星

迎寄王適

投竄千山恨不深
扁舟夏涉氣如烝
重來足馬君何事
歸去飛鴻我未能
養氣經年惟脫粟
讀書終夜有寒燈
安心且作衰慵伴
海底鯢魚會化鵬

王度支陶挽詞二首

風蹟殊不昧
聲名豈偶然
長途催駉驥
爽氣激鷹鷂
蒼苔成遺恨
松楸卜遠年
淒涼故吏盡
誰泣鬣封前

其二

京塵昔傾蓋江國見佳城零落舊冠劍艱難老弟兄存
亡看世俗意氣憶平生曉鐸知人恨幽音亦未平

次韻陳師仲主簿見寄

朽株難刻畫枯葉任凋零舊友頻相問村酤獨未醒山
牙收細茗江實得流萍頗似申屠子都忘足被刑

寄題江渙長官南園茅齋

白髮辛勤困小邦塵勞坐使壯心降河陽罷後成南圃
彭澤歸來卧北窓畦畔草生親荷鋤牀頭酒熟自傾缸

因君遣我添歸興，舊有茅茨濯錦江。

詠霜二首

江南雪不到，霜露滿山村。
紙被欺氈厚，茅簷笑瓦溫。
何曾凝去，沼淥有意隔朝暾。
底日身無事，高眠不出門。

其二

清霜欺客病，乘夜逼窓扉。
坐睡依爐暖，細聲聞葉飛。
蕉絺空滿篋，砧杵旋催衣。
起看庭前草，松筠未覺非。

次韻吳厚秀才見寄

壯心摧折漸無餘，早歲爲文老不如。
登木求魚知我拙，循窠覓兔笑君疎。
清尊獨酌夜方半，白髮潛生歲欲除。
久恐交親還往絕，牀頭猶喜數行書。

乾荔支

含露迎風惜不嘗，故將赤日損容光。
紅消白瘦香猶在，想見當年十八娘。

次韻王適元日并示曹煥二首

井底屠蘇浸舊方，牀頭冬釀壓瓊漿。
舊來喜與門前客，

終日同為酒後狂，老大心情今已盡。
塵埃鬢髮亦無光，江南留滯歸何日。
萬里逢春思故鄉。

放逐三年未遣回，復驚爆竹起春雷。
祈年粗有樽中桂，寄遠仍持嶺上梅。
莫笑牛狸抵羊酪，漫將崖蜜代官醅。
二君未肯嫌貧病，猶得衰顏一笑開。

寄梅仙觀楊智遠道士

道師近在真人峯，欲往見之路無從。
去年許我入城市，塵埃暗天待不至。
莫往莫來勞我心，道書寄我千黃金。

蠶衣肉食思慮短文字滿前看不見口傳指授要有時
脫去羅網當見之梅翁漢朝南昌尉手摩龍鱗言世事
一朝拂衣去不還身騎白鱗翳紅鸞我今雖復墮塵土
道師何不與我語他年策足投名山相逢拍手一破顏

春雪

溫風吹破臘留雪惱新春信逐殘梅到花從半夜勻旋
消微覆瓦狂下亦欺人壓竹時聞落埋萱久未伸山川
濛不解樓觀洗成新攤褐僧方睡開門客屢嘖霽烟知

歲稔履迹笑吾貧畦凍初生韭泥融正賣薪寒魚爭就
汕濁酒頗無巡預喜田宜麥槃飡餅餌頻

贈石臺問長老二絕

并序

石臺長老問公本成都吳氏子棄俗出家手書法華
經字細如黑蟻前後若一將誦之萬遍雖老而精進
不倦脇不至席者二十有三年余來高安以鄉人相
好蓋余懶而好睡見之惕然自警因贈之二小詩云
法達曾經見老盧半生勤苦一朝虛心通口誦方無礙

笑把吳鸞細字書

蜀中藏經往往有古仙人吳
米鸞細書經卷精妙可愛

蒲團布衲一繩牀心地虛明睡自亡長伴空中月天子

東方行道到西方

和毛國鎮白雲莊五詠

掬泉軒

卜築高深已有山起居清潤可無泉穿牆白練秋聲細
照屋青銅曉色鮮已放魚蝦嫵跳擲更除蘋藻任漪漣
只應明月中霄下長共禪心相向圓

平溪堂

清溪似與隱君謀，故入堂前漫不收。
盥手從今休汲井，浮觴取意便臨流。
花漂澗谷來應遠，石激琴箏久未休。
莫把朱欄強圍繞，山家事事要清幽。

眺遠臺

山似高人長遠人，不登高處見無因。
築臺土石無多子，照眼峰巒得許新。
陣馬奔騰時絕遠，風濤舒卷忽無垠。
白雲自是逃名處，猶恐此中藏隱淪。

濯纓庵

臨池濯足惜泉清，纓上無塵且強名。
橫木為橋便獨往，結茅依島類天成。
往還漸少人誰識，寢食無為身轉輕。
有似三吳朱處士，釣魚誰與話西征。

白雲莊偶題

歸去攜家住白雲，雲中猿鶴許同羣。
陶公酒後詩偏好，疎傅金餘客屢醺。
芒屨潛行逐漁釣，壺漿時出勞耕耘。
却看人世應微笑，未熟黃粱畫夢紛。

次韻王適落日江上三首

寒烟冪清江漁唱扁舟上江轉少人家自此知安往維
舟倚叢薄明月獨相向欲曉醉應醒還逐輕鷗颺

其二

稍息南市喧初上東山月潛魚忽驚踴饑雁時斷絕落
葉誤投籤繁霜疑積雪苦寒良難久愛此元氣潔

張秀才見寫陋容

潦倒形骸山上樗每經風雨輒凋疎勞君為寫支離狀

異日長看老病初落筆縱橫中自喜賦形深穩妙無餘
偶然挂壁低頭笑俱幻何妨彼亦如

同王適曹煥遊清居院步還所居

身為江城吏心似野田叟尋僧忽忘歸飽食莫攜手畏
人久成性路繞古城後茅茨遠相望雞犬亦時有人還
市井罷日落孤兔走迴風吹橫烟燒火卷林藪草深徑
漸惡荆棘時挂肘褰裳涉沮洳斜絕汙池口投荒分岑
寂歌側吾自取二君獨何為經歲坐相守遊從乏車騎

飲食厭菰韭周旋未忍棄辛苦亦何負歸來倚南窓試

挹樽中酒笑問黃泥行此味還同否

子瞻謫居齊安自臨臯亭遊東坡路

過黃泥坂作黃泥坂詞二
君皆新自齊安來故云

次韻王適春雨

久遭客禁往還稀風雨蕭條只自知春色有情猶入眼
客愁無賴巧侵眉山僧寄語收茶日野老留人供社時
久住不須嫌寂寞此間偏與拙相宜

和子瞻蜜酒歌

蜂王舉家千萬口黃蠟為糧蜜為酒口銜澗水拾花鬚
沮如滿房何不有山中醉飽誰得知割脾分蜜曾無遺
調和知與酒同法試投麴蘖真相宜城中禁酒如禁盜
三百青銅愁社老先生年來無俸錢一斗徑須囊一倒
鋪糟不聽漁父言煉蜜深愧仙人傳掉頭不問辟穀藥
忍饑不如長醉眠

次韻講律李司理憲見贈

強將羔雁聘黃晞破褐疏巾倚夕暉禮律縱橫開卷盡

齏鹽冷落待賢非日高几案弦歌罷夜永窓扉燈火微
猶喜江邊暮春近舞雩風雨得同歸

次韻王適遊陳氏園

宿雨晴來春已晚衆花飄盡野猶香舞雩便可同沂上
飲禊何妨似洛陽新浦近聞穿沼澗漲江初喜放舟長
年來薄領縈人甚何計相隨入醉鄉

答孔平仲二偈

熟睡將經作枕頭君家事業太悠悠要須睡著元非睡

未可昏昏便爾休

龜毛兔角號空虛既被無收豈是無自有真無遍諸有
燈光何礙也嫌渠

次韻柳真公閒居春日

春寒漸欲減衣綿雨勢冥冥水拍天一局無言消日永
新詩得意許人傳惜花田地應慵掃護筍藩籬可細編
好事報君知我喜同官欲到得閑眠

次韻王適東軒即事三首

新竹依牆未出尋牆東桃李却成林池塘草長初饒夢
村落鶯啼恰稱心江滿船頭朝欲轉泥融屐齒暮尤深
閉門憐子成書癖試買村醪相伴斟

眼看東鄰五畝花茅簷竹戶野人家過牆每欲隨飛蝶
歸舍誰憐已暮鴉幽客偶來成晚飯野僧何日寄新茶
三年氣味長如此歸計遲遲也自嘉

北園春草徑微微未用頻教翦棘茨蜂陣紛紛初養蜜
鶯巢淺淺欲生兒客情流水兼山遠歸夢遊絲向日遲

懶病相將渾欲慣
賴君索我強裁詩

送李憲司理還新喻

采芹芹已老
浴沂沂尚寒
蒯緱長嘆息
首肯正闌干
黃卷忘憂易
青衫行路難
歸耕未有計
且復調閑官

問黃蘗長老疾

四大俱非五蘊空
身心河岳盡消融
病根何處容他住
日夜還將藥石攻

復次烟字韻答黃大臨庭堅見寄二首

水竹遮藏自一川日高茅屋始炊烟犬牙齋米新秋後
麥粒蒸茶欲社天冠蓋只今成棄物杉松他日記栽年
定應笑我勞生在卯睡聞呼衣為顛

十載勞思寤寐間新詩態度比雲烟清風吹我無千里
明月隨人共一天歸去林泉應避暑北征道路恐經年
與君共愧知時鶴養子先依黑柏顛

次韻子瞻臨臯新葺南堂五絕

江聲六月撼長堤雪嶺千重過屋西一葉軒昂方斷渡

南堂蕭散夢寒溪

旅食三年已是家
堂成非陋亦非華
何方道士知人意
授與爐中一粒砂

北牖清風正滿牀
東坡野菜漫充腸
華池自有醍醐味
丈室仍聞薝蔔香

鄰人漸熟客賒酒
故客親留為種蔬
住穩不論歸有日
船通何患出無車

客去知公醉欲眠
酒醒寒月墮江烟
牀頭復有三升蜜

貧困相資恐是天

次韻王適大水

高安昔到歲方閏大水初去城如墟危譙墮地瓦破裂
長橋斷纜船逃遁漂浮隙穴亂羣蟻奔走沙礫摧嘉蔬
里閭破散兵火後飲食弊陋魚蝦餘投荒豈復有便地
遇災祇復傷羸軀人言西有蛟蜃穴閏年每與風雷俱
漫溝溢壑恣游蕩傾崖拔木曾須臾雞豚浪走不復保
老稚裸泣空長吁滯留再與茲水會淪胥未哂斯民愚

人生所遇偶然耳得失何用分鎔銖

贈三局能師二絕

得失從來似偶然因師聊復問行年此生竟墮陰陽數
方信修行力未全

旅食江干秋復春歸耕未遂不勝貧憑師細考何年月
可買山田養病身

臨川陳憲大夫挽詞二首

一時冠蓋盛臨川直亮推公益友先淡泊朱絲初少味

蕭疎翠竹久彌鮮
崎嶇處世曾何病
奔走成功亦偶然
天理更疎終不失
雍雍今見子孫賢

五月扁舟憶過門
哀憐逐客為招魂
開樽不惜清泉潔
揮汗相看白雨翻
病起清言驚苦瘦
歸休尺牘尚相存

秋風灑涕松楸外
談笑猶疑對竹軒

公家有竹軒
轍嘗賦詩

次韻知郡賈蕃大夫思歸

江城漂泊最多時
邂逅誰令長者期
得坎浮槎應有命
投林驚鵲且安枝
何年笑語還留客
終日勤勞數問兒

鈴閣清虛非此比秋風歸興恐非宜

久不作詩呈王適

憐君多病仍經暑笑我微官長坐曹落日東軒談不足
秋風北棹意空勞懶將詞賦占鴉臆頻夢江湖把蟹螯
筆硯生塵空度日他年何用繼離騷

喜王鞏承事北歸

同罪南遷驚最遠乘流北上喜先歸謾言一笑秋風後
却顧千山驛路非嶺外雲烟隨夢遠江邊魚蟹為人肥

還家妓女都無事卧讀詩書盡掩扉

予初到筠即於酒務庭中種竹四叢杉二本及今
三年二物皆茂秋八月洗竹培杉偶賦短篇呈同
官

種竹成叢移出簷三年慰我病厭厭翦除亂葉風初好
封植孤根笋自添高節不知塵土辱堅姿試待雪霜霑
屬君留取障斜日仍記當年此滯淹

和王鞏見寄三首

南遷春及秋江湖未云半速此歸路長始悟行日遠幽
憂脫沈痼清夢驚婉婉行行逢故人笑語雜悲泣

其二

江秋北風多歸帆未應駛天寒雁南向家書空滿紙契
濶幸安平婚嫁須纓珥交遊何為者空復念君至

其三

折葉每安心連環非所計感君扁舟返念我一廬廢懷
思樂全老疇昔忘言契丹砂儻已成白首願終惠

復次韻

滕王閣在誰攜手徐孺胡寬可放情楚客解書南國恨
秦箏助發上林鶯繁艷獨負杯中物攤鼻知逢洛下生
問得長鬚添夢想蓬窓燈火達天明

近遣僕至鍾陵還
言定國與黃君魯

直會於舟中燈
火終夜而去

孔毅父封君挽詞二首

交契良人厚家風李婦賢詩書中有助蘋藻歲無愆象
服期他日恩封屬此年神傷自不覺弔客問潛然

別日笑言重歸來藥餌憂鍾歌掩不試貝葉亂誰收恨
極囊封在情多壘木稠埋文應自作一一記徽猷

上高息軒起亭二絕

山下清溪溪上市溪光山色映人烟幽亭正在人聲裏
長與溪山共寂然

溪父起收罾下鯉山翁起賣焙中茶長官亦與人俱起
笑攤黃紬放早衙

九月十一日書事

東牆瘦菊早開花
九日金鈿已自嘉
黍麥候遲初響
蟻朱鹽法細未還
家潑醅昨夜驚泉
湧洗盞今晨聽婦
誇歸採茱萸重一
醉不須怪問日時
差

和王適寒夜讀書

久從市井役百事廢
不理感君讀書篇
惜此寒夜晷殷勤
附燈燭黽俛就圖
史逡巡揖虞夏汗
漫馳劉李斯文家
舊物早歲夙從事
一從慕羶腥中棄
如敝屣今夕亦何
夕忽如舊遊至終
篇再三歎推枕不
成寐人生無百

金安四庫全書
卷十二
年所欲知有幾懸知未必得奔走若趨市微言寄翰墨
開卷入心耳胡為棄不收所逐在難覩

和王適新葺小室

向日堂東一室存竹為窓壁席為門心如白日光長照
氣結丹砂體自溫飯軟莫嫌紅米賤酒香故取潑醅渾
他年一笑同誰說伴我三年江上村

病中賈大夫相訪因遊中宮僧舍二首

江城寒氣入肌膚得告歸來強自扶五馬獨能尋杜老

一林深愧致文疎體虛正覺身如幻談劇能令病自無
明日出門還擾擾年來真畏酒家壚

東鄰修竹野僧家亂柳枯桑一徑斜逐客慣曾迂短策
使君何事駐高牙蕭條已似連村塢邂逅應容設晚茶
慚愧病夫無氣力隔牆空聽吏兵譁

和王適炙背讀書

少年讀書處寒夜冷無火老來百事慵炙背但空坐眼
昏愁細書把卷惟恐卧寒衣補故褐家釀熟新糯微微

窓影斜暖暖雲陰過昏然偶成寐鼻息已無柰兒童更
笑呼書用正前墮衰懶今自由不復問冬課

同王適賦雪

北風吹雨雨不斷遍滿虛空作飛霰紙窓獨卧不成眠
茅屋無聲時一泣烏鳥錯暮寒未起庭戶空明夜驚旦
重樓複閣爛生光絕澗連山漫不見夾砌雙杉洗更碧
滿田碧草埋應爛城中閉戶無履迹市上孤烟數晨爨
細排玉箸短垂簷暗結輕冰時入研撥灰有客顧尊俎

迹免何人試鷹犬未容行役掃車轂應有老農歌麥飯
一來江城若俄頃四見白花飛面旋坐看酒甕誰敢嘗
歸踏冰泥屢成濺年來橋板斷不屬莫出肩輿足憂患
到家昏黑空自笑媿婦勤勞每長嘆牀頭有酒未用沽
囊裏無錢不勞算更令雪片大如手終勝溪瘴長熏眼
謁告猶能不出門典衣共子成高譙

樂城集卷十二

欽定四庫全書

樂城集卷十三

宋 蘇轍 撰

詩八十六首

除夜

老去不自覺歲除空一驚
深知無得喪久已罷經營
黃卷譏前失清樽借後生
何年遂疎懶伏臘任躬耕

種蘭

蘭生幽谷無人識客種東軒遺我香知有清芬能解穢
更憐細葉巧凌霜根便密石秋芳早叢倚修筠午蔭涼
欲遣蘼蕪共堂下眼前長見楚詞章

上元夜

新春收積雨明月澹微雲照水疎燈出因風遠樂聞天
涯仍有節人事竟何分賣酒真拘束何時一醉醺

次韻王適上元夜二首

燈光欲凝不驚風月色初晴若發蒙羈客不眠詩未就

遊人半醉夜方中
荒城熠燿相明滅
野水芙蓉亂白紅
知欲訪僧同寂寂
應憐病懶畏熅熅

宿雨初乾試火城
端居無計伴遊行
厭看門外繁星動
想見僧窓一點明
老罷逢春無樂事
夢回孤枕有鄉情
重因佳句思樊口
一紙家書百鎰輕

王子立與遲等遊陳家園橋敗幾不成行
晚自酒務往見之明日雨作偶爾成詠

桃李城東近不遙
偶聞花發喜相邀
斷橋似欲妨佳思

好雨猶能借此朝隨分開樽依綠草偶然信馬及餘瓢
重來莫道無閑暇紫燕黃鸝日漸嬌

幽蘭花

李徑桃蹊次第開穠香百和襲人來春風欲擅秋風巧
催出幽蘭繼落梅

珍重幽蘭開一枝清香耿耿聽猶疑空應欲較香高下
故取羣芳競發時

胡長史祠堂

白首青衫仍隱居
晚拋環堵就安輿
生芻忽改烝嘗地
函丈空悲講解餘
弟子璵璠相照耀
兒孫松桂共扶疏
我來恨不瞻遺老
空怪鄉鄰盡讀書

孫賓叟道人

萬里飄然不繫舟
酒壚一笑便相投
千金不換金丹訣
何事惟須一布裘

新橋

六月長橋斷不收
朱欄初喜映春流
虹腰宛轉三百尺

鯨背參差十五舟入市樵蘇看絡繹歸家鹽酪免遲留
病夫最與民同喜不西恩恩無復憂

曾子宣郡太挽詞二首

族大徽音遠年高福祚多生兒盡龍虎封國裂山河象
服驚初揜埋文信不磨送車江郭滿咽絕聽哀歌

其二

安輿遍西北丹旄歷江湖存歿終無憾哀榮兩得俱新
封崇馬鬣餘福薦浮圖家法蘋蘩在空堂始一虞

曾子固舍人挽詞

少年漂泊馬光祿
未路騫騰朱會稽
儒術遠追齊稷下
文詞近比漢京西
平生碑版無容繼
此日銘詩誰為題
試數廬陵門下士
十年零落曉星低

次韻王適一百五日太平寺看花二絕

遍入僧房花照眼
細尋芳徑蝶隨行
歸時不怕江波晚
新有橋虹水上橫

小檻明窓曾不住
閑花芳草遣誰裁
但須匹馬尋幽勝

攜取清樽到處開

又次韻遊小雲居

溪上浮花片片輕
沂流登岸得山行
僧房幽絕雲居小
春日陰晴野色明
永遠林棲真有道
溺沮耕養亦忘情
此身此意何年遂
空使常談笑老生

次韻秦觀梅花

病夫毛骨日凋槁
愁見朱鹽惟醉倒
忽傳騷客賦寒梅
感物傷春同懊惱
江邊不識朔風勁
牆頭亦有南枝早

未開素質夜先明半落清香春更好鄰家小婦學閑媚
靚粧惟有長眉掃孤芳已與飛霞競結子仍先百花老
苦遭橫笛亂飛英不見遊人醉芳草可憐物性空自知
羞作繁華助芒屨

復次前韻答潛師

憐君古木依巖槁西江飲盡須彌倒野花幽草亦何為
嶮韻高篇空自惱萬點浮溪輒長嘆一枝過嶺仍誇早
拾香不忍遊塵汙嚼蕊更憐真味好道人遇物心有得

瓦竹相敲緣自掃誰知真妄了不妨令我至今思璉老
妙明精覺昔未識但向閑窓看詩草浮雲時起鳥四飛
畢竟安能亂清昊

景福順老夜坐道古人搐鼻語

中年聞道覺前非邂逅仍逢老順師搐鼻徑參真面目
掉頭不受別鉗鎚枯藤破衲公何事白酒青鹽我是誰
慚愧東軒殘月上一杯甘露滑如飴

畫枕屏

繩牀竹簟曲屏風
野水遙山霧雨濛
長有灘頭釣魚叟
伴人閑卧寂寥中

次韻王適留別

遠謫勞君兩度行
復將文字試平衡
干時豈為斗升祿
聞道應忘寵辱驚
未了新書誰與讀
重留佳句不勝情
決科事畢知君喜
俗學消磨意自清

次韻子瞻特來高安相別
先寄遲適遠却寄邁迨
過遜

老兄騎驟日百里據鞍作詩若翻水忽吟春草思惠連
因之亦夢添丁子羣兒競長堪一笑老馬卧餐何日起
聞兄盡室皆舊人見面未曾惟遜耳遲年最長二十六
已能幹父窮愁裏豫兒揚眉稍稍勁黨子溫純無愠喜
我兄憔悴我亦窮門戶久長真待爾但令戢戢見頭角
甌倒囊空定何恥家藏萬卷須盡讀此外一簪無所恃
船中未用廢詩書閉窓莫看江山美

次韻子瞻端午日與遲适遠三子出遊

人生逾四十朝日已過午一違少壯樂日迫老病苦丹
心變為灰白髮粲可數惟當理鉏耰教子藝稷黍誰令
觸網羅展轉在荆楚平生手足親但作十日語朝遊隔
提攜夜卧困烝煮未歌棠棣詩已治芻靈祖士生際風
雲富貴若騎虎奈何貧賤中所欲空齟齬

次韻子瞻留別三首

公來十日坐東軒手自披雲出朝日山川滿目竟何有
波浪翻天同一濕諸門迭出驚異狀間道懷歸終舊壁

此行十里隔江河何人更問維摩疾

野人性似修行僧長願幽居近林麓南遷無計脫簪組
西歸誰為栽松竹頭上白雲即飛蓋耳畔清泉當鳴玉
洛川猶是冠蓋林更願高飛逐黃鵠

東西南北無住身羯末封胡四男子彫搜不遣治章句
爛漫先令飽文字踈慵嗟我屬之人生子夜中惟恐似
傳家粗足不願餘同駕柴車還我里

次韻子瞻行至奉新見寄

四年侯公書長視飛鴻背十日留公談欲作白蓮會

州藥

無可語者往還但一二僧耳

匏瓜一遭繫賣酒長不在夜歸步江湄

明月照清瀨心開忽自得語意竟非背

音倍

一尊談入閒

萬事寂寥外欲同千里行奈此一官礙何年真耦耕舉世無此大

贈醫僧鑒清二絕

肘後醫方老更精鬚眉白盡氣彌清只應救病能無病
豈是平生學養生

門人久作開堂老庭檜看成合抱圍他日浴堂歸洗背
回頭還解放光輝

贈醫僧善正

老怯江邊瘴癘鄉城東時喜到公房厯言五藏如經眼
欲去三彭自有方身厭遠遊安靜術因多病更深長
時時為我談尊宿曾入南公古道場

食菱

野沼漲清泉烏菱不直錢蠃肥螯正滿石破髓初堅節

物秋風早樽疊夜月偏令人思淮上小舫藕如椽

留滯高安四年有餘忽得信聞當除官真揚間偶
成小詩書於屋壁

數間茅屋久蹉跎四見秋風入薜蘿北棹偶然追雁羽
南公誰復伴漁蓑三年賈傳驚吾老九歲劉郎愧爾多
此去仍家江海上不妨一葉弄清波

洪休上人少年讀書以多病出家居泐潭為馬祖
修塔以三絕句來謁答一首

早除郎將少年狂祖塔結緣歸故鄉習氣未消餘業在
逢人依舊琢詩章

勉子瞻失幹子二首

人生本無有衆幻妄聚耳手足非吾親何況妻與子偶
來似可樂強作室家喜忽去未免悲欣成要矜毀君家
兩歲兒畢竟何自始變化違初心涕泗劇翻水吾儕近
始悟造物聊復試道力竟未完聰明信難恃

破甑不復顧彼無愛甑心棄壁負赤子始驗愛子深誠

知均非我胡為有不能一從三界遊久被百物侵朝與
喜怒交暮與寵辱臨四物皆不勝生死獨未曾不經大
火燒孰為真黃金棄置父子恩長住旃檀林

偶遊大愚見餘杭明雅照師舊識子瞻能言西湖
舊遊將行賦詩送之

五年賣鹽酒勝事不復知城東古道場蕭瑟寒松姿出
遊誠偶爾相逢亦不期西軒吳越僧弛擔未多時言住
西湖中巖谷涵清漪却背閭井喧曲盡水石奇昔年蘇

夫子杖屨無不之三百六十寺處處題清詩麋鹿盡相
識況乃比丘師辯淨二老人精明吐琉璃笑言每忘去
蒲褐相依隨門人几杖立往往聞談詞風雲一解散變
化何不為辯入三昧火郊塔長松歌淨老不復出麈尾
清風施蘇公得罪去布衣拂霜髭空存壁間字鬱屈蟠
蛟螭知我即兄弟微官此棲遲問何久自苦五斗寧免
餓俯首笑不答且爾聊教嬉我兄次公狂我復長康癡
反復自為計定知山中宜但欲畢婚娶每為故人疑君

歸漫灑掃野鶴非長羈

將移績溪令

坐看酒壚今五年恩移巖邑稍西還
他年貧富隨天與何日身心聽我閒
山栗似拳應自飽蜂糖如土不須慳
仲卿意向桐鄉好身後烝嘗亦此間

約洞山文老夜話

山中十月定多寒纔過開爐便出山
堂衆久參緣自熟郡人迎請怪忙還
問公勝法須時見要我清談有夜闌

今夕客房應不睡欲隨明月到林間

將之績溪夢中賦泊舟野步

扁舟逢野岸試出步崇岡山轉得幽谷人家餘夕陽被
畦多綠茹堆屋剩黃梁深羨安居樂誰令志四方

謝洞山石臺遠來訪別

竄逐深山無友朋往還但有兩三僧共遊渤澥無邊處
扶出須彌最上層未盡俗緣終引去稍諳真際自虛澄
坐令顛老時奔走竊比韓公愧未能

贈方子明道人

水銀成銀利十倍丹砂為金世無對此人
斬術不肯傳闔戶泥牆畏天戒今子何為與我言
人生貧富寧非天鉗鎚橐籥枉心力
葢鹽布被隨因緣我來江西晚聞道
一言契我心所好廓然正若太虛空
平生伎倆都除掃子言舊事淨慈師
未斷有為非淨慈此術要將救饑耳
人人有命何憂饑

回寄聖壽聰老

五年依止白蓮社，百度追尋丈室遊。
睡待磨茶長展轉，病蒙煎藥久遲留。
贊公夜宿詩仍作，異老堂成記許求。
回首萬緣俱一夢，故應此物未沈浮。

乘小舟出筠江二首

短舫漂浮真似葉，小篷低淺僅如巢。
幽吟但覺山川走，困睡不知風雨交。
紅飯白醪供醉飽，青簑黃菊可纏包。
一竿鶴髮他年事，萬斛龍驤任見嘲。

宦遊欲學林間鵲，每到新年旋疊巢。
蓬筍籠船聊似屋，

漁樵把臂便成交不妨袖裏攜詩卷尚可牀頭置藥包
古史欲成身愈困客來未免答譏嘲

寄題孔氏顏樂亭

顏巷久已空顏井固不遷荆榛翳蔓草中有百尺泉誰
復飲此水裏飯耕廢田有賢孔氏孫芟夷發清源廢牀
見綆刻古甃昏苔痕引缸注瓢樽千歲忽復然嗟哉古
君子至此良獨難口腹不擇味四體不擇安遇物一皆
可孰為我憂患阮生未忘酒嵇生未忘鍛欲忘富貴樂

託物僅自完無託中自得嗟哉彼誠賢

徐孺亭

徐君鬱鬱澗底松陳君落落堂上棟澗深松茂不遭伐
堂毀棟折傷其躬二人出處勢不合譬如日月行西東
胡為賓主兩相好一榻挂壁吹清風人生遇合何必同
一朝利盡更相攻先號後笑不須怪外物未可疑心胸
比干諫死微子去自古不辨汙與隆我來故國空嘆息
城東舊宅生茅蓬平湖十頃照清廟獨畫徐子遺陳公

二人皆合肥社稷胡不相對祠堂中

滕王閣

客從筠溪來歌仄困一葉忽逢章貢餘滉蕩天水接風
霜出洲渚草木見毫末勢奔西山浮聲動古城葉樓觀
却相倚山川牙開闔心驚魚龍會目送鳬雁滅遙瞻客
帆久更悟江流濶史君東魯儒府有徐孺榻高談對賓
旅確論精到骨餘思屬湖山登臨寄遺堞驕王應笑滕
狂客亦憐勃萬錢罄一飯千金賣豐碣豪風相凌蕩俳

語終倉猝

歐陽文忠公嘗云王勃記文似俳而唐人貴之如此何也

事往空長江人

來逐飛楫短篇竟蕪陋絕景費彈壓但當倒罌瓶一醉

付江月

次韻道潛南康見寄

一葉追隨魚與龍紅粳白酒幸年豐也知山色遙相待
若畏君詩欲見攻乘興風帆終日去尋幽蠟屐及春同
請君先入開先寺待濯清溪看玉虹

車浮

并序

結木如巢承之以簣沈之水中以浮識其處方舟載
兩輪挽而出之漁人謂之車浮此詩所謂汕也與遲
适同作車浮詩

寒魚得汕便為家兩兩方舟載小車謀食旋遭芳餌誤
求安仍值積薪遮情存未免人先得欲盡要令物莫加
身似虛舟任千里世間何處有浮置

題都昌清隱禪院

北風江上落潮痕恨不乘舟便到門樓觀飛翔山斷際

松筠陰翳水來源升堂猿鳥晨窺坐乞食帆檣暮遠村
誰道谿巖許深處一番行草認元昆

長老惟湜曾識子瞻兄於淨因有簡

石刻

逢章戶掾赴澧州

江船不厭窄船窄始宜行風裏長先過灘頭一倍輕迎
親無惡處祿養勝躬耕澧上春蘭早猶堪弔屈生

除夜泊彭蠡湖遇大風雨

暮發鄖陽市曉榜彭蠡口微風吹人衣霧遠廬山首舟

人釋篙笑此是風伯候杙舟未及深飛沙忽狂走暗空
轉車轂淥水起岡阜衆帆落高張斷纜已不救我舟舊
如山此日亦何有老心畏波瀾歸卧塞窓牖土囊一已
發萬竅無不奏初疑邱山裂復恐蛟蜃鬪鼓鐘相轟阗
戈甲互磨叩雲霓黑旗展林木萬弩設曳柴眩人心振
旅擁軍後或為羈雌吟或作倉兕吼衆音雜呼吸異出
珠圈白中宵變凝冽飛霰集粲粲蕭騷蓬響乾晃蕩窓
光透堅凝忽成積澎湃珠未究紵縞鋪前洲瓊瑰琢遙

岫山川莽同色高下齊一覆淵深竄魚鼈野曠絕鳴雉
孤舟四鄰斷餘食數升糗寒釐僅盈盎腊肉不滿豆敝
裘攤衾眠微火拾薪構可憐道路窮坐使妻子詬幽奇
雖云極岑寂頃未覩一年行將除茲歲真浪受朝來陰
雲剝林表紅日漏風稜恬已收江練平不縐兩漿舞夷
猶連峰吐奇秀同行賀安穩所識問癯瘦驚餘空自憐
夢覺定真否春陽著城邑屋瓦凍初溜艱難當有償爛
漫醉醇酎

正旦夜夢李士寧過我談說神怪久之草草為具
仍以一小詩贈之

先生惠然肯見容旋買雞豚旋烹炙人間飲食未須嫌
歸去蓬壺却無喫

舟中風雪五絕

北風吹雪密還稀雪勢漸多風力微孤棹獨依銀世界
山川路絕欲安歸

曉風吹浪作銀山夜雪爭妍布玉田風力漸衰波更惡

通宵撼我正安眠

擁纜埋蓬不見船
船窓一點暮燈然
幽人永夜歌黃竹
賴有丹砂暖寸田

濁醪粗飯不成歡
白浪飛花雪作團
窓外時來一雙鴨
沈浮笑我不禁寒

江面澄清雪未融
扁舟蕩漾水無蹤
篙師不用怱怱去
遍看廬山羣玉峰

題南康太守宅五老亭

五老高閑不入城，開軒肯就史君迎。
座中莫著閑賓客，物外新成六弟兄。
雲氣飄浮衣袂舉，泉流灑落佩環聲。
岌然終日俱無語，靜壽相看意自明。

書廬山劉顥宮苑屋壁三絕

一作陪南康太守訪廬山劉顥宮苑留題

絕三

山西舊將本書生，歸老巖間未厭兵。
卧聞布水中宵起，錯認邊風萬馬聲。

雕弓挂壁恥言勲，出入樵漁便作羣。
五馬親來看射虎，

金匱山房詩集 卷十三
不愁醉尉惱將軍

肩輿已棄躡風騅
舊物仍存楊柳枝
一曲清歌近尤好
五陵故態未全衰

再遊廬山三首

當年五月訪廬山
山翠溪聲寢食間
藤杖復隨春色到
寒泉頻與客心閑
巖頭懸布煎茶足
峽口驚雷泛葉慳
待得前村新雨遍
扁舟應逐好風還

憶自栖賢夜入城
道邊蘭若一僧迎
偶然不到終遺恨

特地來遊慰昔情海外聲聞安至此堂中天鼓為誰鳴

惓惓復向深山去一盞醍醐飽粟罌

羅漢院有新羅羅漢堂中法鼓特大

此山巖谷不知重赤眼浮圖自一峰芒屨隨僧踐黃葉
曉光消雪墮長松石泉試飲先師錫午飯歸尋下寺鐘
勝處轉多渾恐忘出山惟見白雲濃

汲陽阻風

鍾陵距池陽相望千里內江神欺我貧屢作風雨礙欲
投皖公宿三日逢一噫孤蓬面空山朝食淡無菜白醪

幸餘滙黃卷漫相對饑吟非吾病疾走老所戒焦先近
不遠蝸舍聞尚在區區問養生借我一帆快

張嘉祐

道人何為者陽狂時放言寶塔昔所構鐵券今尚存

此張

所言其餘
都不可曉

漫浪難究悉孰知彼根源草莽劣容膝俯仰

拳肩跟無食輒行乞一飽常閉門爾來二十年未嘗變

寒溫嗟哉豈徒然此意未易言偶來一笑喜但恐笑我

昏

效韋蘇州調嘯詞二首

漁父漁父水上微風細雨青簑黃筍裳衣紅酒白魚暮
歸暮歸暮歸暮歸長笛一聲何處

歸雁歸雁飲啄江南南岸將飛却下盤桓塞北春來苦
寒苦寒苦寒寒苦藻荇欲生且住

至池州贈陳鼎秀才

淮陽學舍舊相依常誦曹溪第一機却到江西心有悟
回看過去事皆非孤舟遠適身如寄二頃躬耕道自肥

欲看齊山君去否閑中徒侶近來稀

次韻遲初入宣河

遠客安長道低蓬稱小溪雲添濕帆雨舟滯沒蒿泥草
綠耕牛健村深侯鳥啼陶翁方作令歸去未成題

次韻侯宣州利建招致政汪大夫

社甕壺漿接四鄰肩輿拄杖試紅塵慣眠林下三竿日
來看城中萬井春世上升沈無限事樽前強健不貲身
經過已足知公政長見車中有老人

次韻侯宣城疊嶂樓雙溪閣長篇

作官如負擔一負當且弛不知息肩處妄問道遠邇我
乘章江流却入宛溪水捨舟陟崔嵬行路極句已名都
便欲過佳處賴公指仰攀疊嶂高俯閱雙溪美不悟身
乘空但覺風吹耳雲烟變遙壑歌吹聞近市倦遊得清
曠行役有新喜公言頃榛穢斬伐從我始堰水種蒲蓮
開山蒔梅李攤本待成陰養花要食子遺風揖桓謝父
老邀黃綺邦人魚依蒲食客莪在芷春陰迫寒食謂我

姑且止嗟余去鄉國屢把刀環視感公鵠鷺修憐我鳬
鴨庫異邦逢故人寧復固辭理高談雲漢上爛醉笙歌
裏落日盡公歡推挽未應起

初到績溪眎事三日出城南謁二祠遊石照偶成
四小詩呈諸同官

行年五十治邱民初學催科愧廟神無限青山不容隱
却看黃卷自憐貧雨餘嶺上雲披絮石淺溪頭水感鱗
指點縣城如手大門前五柳正搖春

右梓桐廟

石門南出衆山巔沃壤清溪自一川
老令舊諳田事樂春耕正及雨晴天
可憐鞭撻終無補早向叢祠乞有年
歸告仇梅省文字麥苗含穗欲蠶眠

右汪王廟

行盡清溪到碧峰陰崖翠壁畫杉松
故留石照邀行客上徹青山最後重

雨開石照正新磨鳥度猿攀野客過
忽見塵容應笑我

年來底事白鬚多

右石照二首

縣中諸花多交代江君所栽牡丹已過芍藥方盛

偶寄小詩

偶來山邑便成家慚愧潘生滿縣花想見清樽檻邊飲
尚留佳句壁間誇根株未老年年好艷色方穠日日加
聞道北遊無意味春深河上足風沙

楊主簿日本扇

扇從日本來風非日本風風非扇中出問風本何從風
亦不自知當復問太空空若是風穴既自與物同同物
豈空性是物非風宗但執日本扇風來自無窮

次韻答人幽蘭

幽花耿耿意羞春紉佩何人香滿身一寸芳心須自保
長松百尺有為薪

次韻江法曹山間小酌

高情不柰簿書圍行揖青山肯見隨綠野逢花將盡日

清樽迨我正閑時
簷間雙燕欲生子
葉底新梅初滿枝
笑殺華陽窮縣令
牀頭酒盡只頻眉

客舍小池有鷓鴣遺二小雛二首

半畝清池藻荇香
一雙鷓鴣競悠揚
來從碧澗巢安在
飛過重城母自將
野鳥似非官舍物
宰君皆是釣魚郎
直言愧比奇章老
得縣無心更激昂


清池定誰至鷓鴣
自來馴知我無傷
意憐渠解托身橋
陰棲息穩島外往
來頻勿食遊魚子
從教長細鱗

次韻答人見寄

對案青山雲氣騰天將隙地養無能
窓扉迎署梅將溜
虛市無人冷欲冰
寂默忘言慚社燕
毳毼困睡比春鷹
深知太府容衰病
復值年來蠶麥登

次韻答人檻竹

猗猗元自直
落落不須扶
密節風吹展
清陰月共鋪
叢長傲霜雪
根瘦恥泥塗
更種愁無地
應須翦碧蘆



樂城集卷十三